

პასივში - კიდევ ერთი ქულა

თბილისი. “დინამოს” სტადიონი. 17 აპრილი.

“დინამო” (თბილისი) – “კრილია სოვეტოვი (კუიბიშევი) 0:0.

“დინამო”: ურუშაძე, ბ. სიჭინავა (რეზერვში), პეტრიაშვილი, ჭელიძე, ცხორებოვი, კუტივაძე, ილიაძე, მეტრეველი, ნოღია, ასათიანი, მესხი.

“კრილია სოვეტოვი”: აგურევი, ბობილევი, გ. სახაროვი, კაპსინი, ვალკოვი, გორშოვი, მაიოროვი, ე. სახაროვი, სტარკოვი (გეცკო), კადიროვი, ჟუკოვი.

მსაჯი ი. პონომაროვი (კიშინიოვი).

დუბლიორები – 1:0 “დინამოს” სასარგებლოდ.

თუ როგორ ითამაშებდა თბილისში “კრილია სოვეტოვი”, დიდი საიდუმლოება არ უნდა ყოფილიყო დინამოელთათვის. ამ გუნდს ლამაზ ფეხბურთზე არა აქვს პრეტენზია და არც სარისკოდ გაიხდის საქმეს. ქულა, ერთი ქულა – აი, მისი დევიზი.

მართლაც, კუიბიშეველებს რაიმე სიურპრიზი არ მოუშადადებიათ ჩვენი გუნდისთვის. როგორც კი დაიწყებოდა მასპინძელთა იერიში, სტუმრების დაცვას სასწრაფოდ ემატებოდნენ წინა ხაზის მოთამაშეები და საჯარიმო მოედანთან 8-9-კაციანი “ბეტონი” მზად იყო.

ასეთი “ზედაცვის” წინააღმდეგ თბილისელებმა ორიგინალური ვერაფერი გამოძებნეს და თუმცა საერთო უპირატესობა მათ ჰქონდათ, მისი რეალიზებისთვის სწორი გზა არ იქნა გამონახული. შეტევა იყო შეჯგუფული, ქაოტური, თავდამსხმელები დრიბლინგით ცდილობდნენ გასვლას იქ, სადაც ეს შეუძლებელი იყო. ზედმეტად ატარებდნენ ბურთს მეტრეველი, მესხი, კარის სიახლოვეს არავითარ ხიფათს არ ქმნიდა ასათიანი, ხოლო ილიაძე და კუტივაძე არაზუსტად აწვდიდნენ ბურთს. თუ არ ჩავთვლით ორიოდ სახიფათო მომენტს, სტუმართა დაცვამ მთლიანად უზრუნველყო თავისი კარის უშიშროება ისე, რომ მეკარე აგურეევს მაინცდამაინც დიდი ჯაფა არ დადგომია.

თბილისელებმა საკუთარ მინდორზე კიდევ 1 ქულა დაკარგეს.

რ. ქორიძე.

“ლელო”, 18 აპრილი, 1967 წ.